

दिनांक 06.07.2024

समय: 18.45 बजे

आकाशवाणी जयपुर-अजमेर

प्रादेशिक समाचार....

- संसद रो बजट सत्र 22 जुलाई ने सरू व्हेला- केन्द्रीय बजट 23 जुलाई ने पेश कर्यो जावेला ।
- केन्द्र सरकार आवता पांच साल मांय दो लाख ग्राम पंचायतां मांय बहुद्देश्यीय प्राथमिक कृषि ऋण सोसायटियां खोलेला ।
- राज्यपाल कलराज मिश्र विश्वविद्यालयां ऊं नुवा ज़माना अर नौजवानां री रुचि रे मुजब कोर्स तैयार करण बाबत् कह्यो ।

अर

- प्रदेश रा ऊगणी हलकां मांय केई ठौड़ां ज़ोरदार बिरखा-मौसम विभाग आज ई अलवर, भरतपुर, दौसा अर धौलपुर जिलां मांय कटे-कटे घणी ज़ोरदार बिरखा सारू चेतायो ।

000

संसद रो बजट सत्र ई महीना री 22 तारीख ने सरू व्हेला । संसदीय कार्य मंत्री किरेन रिजिजू सोशल मीडिया पोस्ट रे जरिये आ जाणकारी दीनी । वे बतायो के 12 अगस्त ताई चालण वाळा बजट सत्र मांय 23 जुलाई ने केन्द्रीय बजट लोकसभा मांय पेश कर्यो जावेला । रिजिजू कह्यो के राष्ट्रपति द्रौपदी मुर्मू बजट सत्र रा तैत संसद रा दोन्यू सदनां रो सत्र बुलावण रा प्रस्ताव बाबत् केन्द्र सरकार री सिफारिश मंजूर कर लीनी है ।

000

गृहमंत्री अमित शाह कह्यो है के सरकार आवता पांच साल मांय करीब दो लाख ग्राम पंचायतां मांय बहुद्देश्यीय प्राथमिक कृषि ऋण सोसायटी- पैक्स री सरूआत करेला । अ पैक्स वां ग्राम पंचायतां मांय खोली जावेला जटे हाल ताई सहकारिता रो सुबीतो नी है । शाह 102 वां अंतर्राष्ट्रीय सहकारिता दिवस रे मौके गुजरात रा गांधी नगर मांय राख्यी ज्या सहकार से समृद्धि कार्यक्रम रे दौरान ओ ऐलाण कीनो ।

अमित शाह सहकारिता समितियां ने व्यवहारिक बणावण सारू सहकारी नेटवर्क ने बधावो देवण माथे जोर दीनो । वे कह्यो के सहकारिता हलका रा पूरा माली लेन-देन सहकारिता हलका मांय ई व्हेवण री सूरत मांय सहकारी समितियां कने पर्याप्त धन व्हेला । कार्यक्रम

रे दौरान नेशनल को-ऑपरेटिव ऑर्गेनिक्स लिमिटेड रा भारत ऑर्गेनिक आटा री सरूआत करी ज्यो।

000

दुबारा लोकसभा अध्यक्ष बण्या पाछे ओम बिरला पहली दफ़ा वां रा चुणाव क्षेत्र कोटा-बूंदी रा दौरा सारू पधार्या है। वां रो बूंदी ज़िला मांय हिंडौली पूगण परां भारतीय जनता पार्टी रा कार्यकर्ता जोरदार स्वागत कीनो। बिरला हिंडौली मांय रोड़ शो कीनो। बूंदी अर तालेड़ा मांय ई ओम बिरला रो स्वागत करी ज्यो। ई मौके निकाली ज्यो जुलूस मांय लोक कलाकार नाच रो दरसाव कीनो।

000

शिक्षा अर पंचायतीराज मंत्री मदन दिलावर आज सवाईमाधोपुर मांय अहलकारां सागे मीटिंग कर र विकास री अर जनता रा भला री योजनावां री जाणकारी लीनी अर जरूरी हुकम दीना। इण ऊं पैली दिलावर सीमेंट फैक्ट्री रा दुर्गा माता मंदिर परिसर मांय पौधा रोप्या। ई मौके दिलावर जनता ऊं बत्ता ऊं बत्ता पौधा रोपण री अपील कीनी। शिक्षा मंत्री बामनवास उपखण्ड मांय राजकीय उच्च माध्यमिक विद्यालय गुर्जर बड़ौदा रा नुवा भवन रो उद्घाटन ई कीनो।

000

स्वास्थ्य मंत्रालय नीट यू जी काउंसलिंग टाळबा रा समाचार ने गलत बतायो है। मंत्रालय रे मुजब काउंसलिंग री तारीख रो हाल ऐलाण नी करी ज्यो है। नीट यूजी काउंसलिंग टळ जावण रा बारा मांय अखबारां मांय छपी खबारां पाछे स्वास्थ्य मंत्रालय आ सफ़ाई दीनी है।

000

राज्यपाल कलराज मिश्र कह्यो है के तकनीकी शिक्षा मांय मानवीय मूल्यां ने शामिल करता थकां देश रा विकास मांय नौजवानां री भूमिका तैय करी जावणी चाहिजे। वे आज कोटा मांय राजस्थान तकनीकी विश्वविद्यालय रा 13वां दीक्षांत समारोह मांय बोल रह्या हा। वे कह्यो के विश्वविद्यालयां मांय नुवा जमाना अर नौजवानां री रुचि रा कोर्स चलावण सारू कह्यो। राज्यपाल कह्यो के 'विकसित भारत 2047' री सोच रो खास आधार उच्च अर तकनीकी शिक्षा है। वे कह्यो के विश्वविद्यालयां ने ऐड़ा कोर्स तैयार करणा चाहिजे ज्यां री मदद ऊं विज्ञान अर प्रौद्योगिकी काम लेता थकां भारत ओजू विश्वगुरु बण सके। विश्वविद्यालय रा कुलपति प्रो एस.के.सिंह विश्वविद्यालय रो प्रगति प्रतिवेदन पेश कीनो। कार्यक्रम पाछे राज्यपाल विश्वविद्यालय परिसर मांय पौधा ई रोप्या। दीक्षांत समारोह में स्नातकोत्तर पाठ्यक्रमां में सर्वोच्च स्थान प्राप्त करने पर नयांशी जैन को 2022 का कुलाधिपति स्वर्ण पदक जबकि नेहा सुराणा को 2023 का कुलाधिपति स्वर्ण पदक प्रदान किया गया। दिव्यांशी यादव को 2022 को कुलपति स्वर्ण पदक एवं गजल लता को 2023 का कुलपति स्वर्ण पदक प्रदान किया गया। कुल 44 छात्र-छात्राओं को स्वर्ण पदक दिये गये। विश्वविद्यालय की ओर से कुल 18 हजार 257 उपाधियां प्रदान की गई हैं।

000

राजस्थान तकनीकी विश्वविद्यालय कोटा रो 13वां दीक्षांत समारोह आज विश्वविद्यालय परिसर मांय राखी ज्यो। जळसा मांय राज्यपाल कलराज मिश्र साल 2022 अर 2023 मांय

पास व्ह्या विद्यार्थियां ने उपाधियां दीनी। जळसा मांय आं दोन्यू साल मांय सब ऊं चोखा नम्बर लावण वाळा दो-दो विद्यार्थियां ने कुलाधिपति अर कुलपति पदक दे र नवाजी ज्या। ई रे अलावा 44 विद्यार्थियां ने सोना रा तमगा दे र नवाजी ज्या।

000

प्रदेश रा ऊगणी हलकां मांय केई ठौड़ां जोरदार बारिश व्ही है। **बारां** ज़िला रा शाहबाद मांय सब ऊं बत्ती 195 मिलीमीटर बरसात व्ही। **टोंक** ज़िला मांय बरस रह्या जोरदार मेह रे कारण सहोदरा, घारेड़ा सागर, ढीबरू सागर, हालोलाव सागर, भावलपुर अर केरवालिया बंधां माथे रपट चाल ग्यी है। ज़िला रा देवली मांय डोढ़ सौ अर मालपुरा 140 मिलीमीटर पाणी बरस्यो। मौसम विभाग कानी ऊं टोंक ज़िला मांय आज ई भारी बारिश रा आसार जतायां पाछे पूरी सावचेती राख्यी जा रही है। जिला कलेक्टर डॉ. सौम्या झा घणी जोरदार बारिश वाळा बोरखंडीकलां अर लावा समेत केई ठौड़ां रो दौरो कर र हालात रो जायजो लीनो। वे जनता ऊं बिरखा रा दौर मांय घर मांय ई रेहवण री अपील कीनी।

टोंक ज़िला मांय जोरदार बिरखा रे कारण बनास नदी मांय घणो पाझी आ रह्यो है। ई बीचे **सवाईमाधोपुर** ज़िला मांय डिडायच ऐचेर कने चादर चाल रही है जिण रे कारण आवण-जावण मांय परेशानी व्हे रही है। आज श्रीगंगानगर अर आरे-सारे रा हलकां मांय मेह बरस्यो। ई बीचे मौसम विभाग आज अलवर, भरतपुर, दौसा अर धौलपुर जिलां मांय कठे-कठे घणी जोरदार बिरखा सारू चेतायो है। महकमा रे मुजब बूंदी, जयपुर, करौली, सवाईमाधोपुर, सीकर अर टोंक जिलां मांय कठे-कठे जोरदार बिरखा रा आसार है। मौसम महकमो आवता 48 घंटां मांय राज्य रा उतराद-ऊगणी हलकां मांय कठे-कठे भारी बारिश रा आसार जताया है। महकमो बीकानेर संभाग मांय आवता 2-3 दिन दोपहरां पाछे बादळां री गाज अर आंधी सागे बिरखा व्हेवण री संभावना जतायी है।

000

विश्व पशु जन्य रोग दिवस रे मौके आज राज्य मांय न्यारी-न्यारी ठौड़ां कार्यक्रम राख र ढांढा-ढोरां रे कारण व्हेवण वाळी बीमारियां ऊं बचाव रा तरीकां री जाणकारी दीरीजी। अ बीमारियां मांदा जिनावरां रा दूषित मांस, जिनावरां री लार, खून, मूत्र अर बलगम रे जरिये फैल सके है। आं मांय रेबीज़, स्क्रब टायफस, एवियन इनफ्लुएंजा अर जापानी इन्सेफेलाइटिस सरीखी बीमारियां शामिल हैं। ई मौके झालावाड़ रा अस्पतालां मांय जनता ने ऐडी बीमारियां ऊं बचाव रा बारा मांय जाणकारी दीरीजी। उपमुख्य चिकित्सा अर स्वास्थ्य अधिकारी डॉ. लेखराज मालव बतायो के गाय, भैंस, भेड़, बकरी, ऊंट, कुत्ता, बिल्ली, सूअर या बंदर रे बटको भर लेवण री सूरत मांय तुरत डॉक्टर ने बतावणो चाहिजे।

000

आज दूरदर्शन राजस्थान रो स्थापना दिवस मनायो जा रह्यो है। दूरदर्शन केन्द्र जयपुर रा केन्द्र अध्यक्ष सतीश देपाल बतायो के डी.डी. राजस्थान जनता री उम्मीदां रे मुजब कार्यक्रम प्रसारित कर र जनता मांय गहरी पैठ बणायी है। केन्द्र री कार्यक्रम प्रमुख सीमा विजय बतायो के स्थापना दिवस रे मौके आज रात आठ बज्यां डी.डी. राजस्थान चैनल माथे खास कार्यक्रम **“नैणा रा झरोखा सूं”** प्रसारित कर्यो जावेला। कार्यक्रम मांय कुचामनी ख्याल लोकनाट्य शैली रा नामी कलाकार दयाराम भांड अर तमाशा शैली रा नामी कलाकार दिलीप भट्ट प्रस्तुति देवेला।

000

जैसलमेर रा आकांक्षी ब्लॉक फतेहगढ़ री आज राख्यी ज्यी मासिक समीक्षा बैठक मांय डॉ. राजेंद्र कुमार पालीवाल चिकित्सा अधिकारियां अर एएनएम ने मलेरिया अर डेंगू सरीखी मौसमी बीमारियां री रोकथाम अर वां माथे काबू करण सारू काम करण रा हुकम दीना। मीटिंग मांय घर—घर सर्वे रे दौरान पाणी री टंकियां मांय टेमीफोज डालण अर मलेरिया री ठा पड़बा री सूरत मांय मरीजां ने जरूरी ईलाज देवण रा हुकम दिया ज्या।

000

जालोर मांय “एक पेड़ मां के नाम” वृक्षारोपण महाभियान रा तहत आज सरकारी दफतरां मांय पौधा रोपी ज्या। विधानसभा रा मुख्य सचेतक जोगेश्वर गर्ग राजकीय उच्च माध्यमिक विद्यालय लेटा परिसर मांय नीम रो पौध रोप्यो

000